

# Vizit Labalenn

enn zur dan enn vilaz  
ti ena enn peser apel Tiko  
ki li abitye kul laliyn  
andeor brizan Flikanflak

me sa zur la  
enn zur dimans  
li leve avan soley leve  
li deside  
"mo va amenn enn kantite petrol zordi  
mo al fer latrenn andeor brizan"

enn zoli larul dan gran lamer  
li met enn urit plastik lor enn laliyn  
tiruze vivan lor lot de laliyn  
li ale-vini fer latrenn  
olarz Rivyer Nwar  
pran lor rado Omorn  
vinn lor rado Flikanflak  
so moter rule rule rule  
kuma patpatwa, patpatwa, li ale

enn zwazo li pa truve  
enn pwason li pa truve  
pa naryen mem  
"bez" li dir  
"bez"  
akoz komye petrol li pu gaspiye

enn sans labriz leve  
alor li teyn moter  
li met lavwal  
li fer latrenn tuzur  
me gratis asterla  
silans asterla  
zis sa son lamer pe kares pirog

Tiko bwar inpe dilo  
li rod zwazo  
enn zwazo pa truve  
enn pwason pa truve  
pa naryen mem  
"bon"li dir  
"byin bon"  
akoz li trankil  
li tusel  
li byen

apre  
li bes so sapo lor so latet  
pu bar larder  
li kal labar  
ar so lipye  
kontantman ar li  
li preske gayn somey

silans  
li tusel  
okenn lot pirog pena

ni bato lapés

enn zwazo li napa truve  
enn pwason li napa truve  
lape



enn ku

li tann enn son  
kumsidire enn kikenn pe respire  
enn kikenn pe pran enn gran respirasyon  
lerla li pe pus ler  
pran enn lot respirasyon  
lerla pus ler  
prekot li  
omilye lamer  
omilye sa silans la  
"martin?"  
li dir  
"ki ete sa?"

li pus so sapo ek so pus  
li gete

li sezi  
li perdi lesuf  
anplas

pre pre pre kot so pirog  
apenn sinkant met  
li truv de gro labalenn  
finn koste ar so pirog  
finn mont lao, finn flote  
akote pirog  
pe get li  
kuma de gran vas  
trankil  
lant  
kalm  
pe respire  
pe koste ar pirog  
pirog pe koste ar zot  
pe respire  
pe koste are pirog  
pirog pe koste ar zot  
sa de la finn vinn rann Tiko enn vizit  
vinn fer li enn plezir  
vinn pas enn moman ar li

pe respire  
pe koste ar pirog  
pirog pe koste ar zot  
pe respire  
pe koste ar pirog  
pirog pe koste ar zot

Tiko dir "pa bizin pran enn su traka"

so leker pe kontan  
zot pe fer li enn loner

de gran dimunn pe rann li enn viziit  
li fyer  
li diyn  
lerla  
ep!  
enn sel kut  
li bes so moter, li met amars  
tapaz leve  
rankont termine  
pangar zot rod grat zot ledo lor fon pirog  
pangar zot tap ar pirog san remarke  
pangar pangar pangar

me tu seki zot finn fer  
se trankil  
lant  
zanti  
poli  
zot finn kule  
an silans  
anba lamer  
zot finn pas  
anba pirog Tiko  
kuma enn trin  
sinkant pye longer

san mem fer enn vag  
san bat zot lake lao

apre tu  
zot ti pe zis  
rann enn ti viziit-de-kurtwazi.

Tiko dimann li  
ziska zordi  
"kifer mo finn dut zot?"

par Lindsey Collen, 1995.

